

ՔՐԵԱԿԱՆ ՀԵՏԱՊՆԴԱՆ ԷՈՒԹՅՈՒՆԸ ԵՎ ԱՅՆ ԲՆՈՒԹԱԳՐՈՂ ՀԱՏԿԱՆԻՇՆԵՐԸ

Նարեկ Մինասյան

*ՀՀ ոստիկանության ներքին անվտանգության
վարչության ծառայողական քննության բաժնի տեսուչ*

Քրեական հետապնդումը բազմեզր հասկացություն է, ուստի սխալ է դրան վերագրել միայն քրեական դատավարության գործառույթ¹: Այն նաև որոշակի դատավարական գործողությունների համակարգ է, որը կարգավորվում է գործող քրեադատավարական օրենսդրությամբ և ներառում է բազմաթիվ տարրեր², որոնցից առավել կարևոր են՝

- 1) քրեական հետապնդումն իրականացնելու ընթացակարգը,
- 2) քրեական հետապնդման սուբյեկտները,
- 3) անձինք, որոնց նկատմամբ իրականացվում է քրեական հետապնդումը,
- 4) քրեական հետապնդման նպատակը:

Քրեական հետապնդման նպատակը դատավարական գործողությունների համակարգն ու միջոցներն են, որոնց միջոցով իրականացվում է քրեական հետապնդումը: Գործող քրեադատավարական օրենսդրությունում այն սահմանված է բավականին մանրամասն, հստակ ու միանշանակ: Դրանով ապահովվում են երաշխիքներ ընդդեմ քրեական հետապնդում իրականացնելու լիազորություններով օժտված պաշտոնատար անձանց ցանկացած կամայականության, որը կարող է հանգեցնել քաղաքացիների իրավունքների և ազատությունների խախտմանը:

Ընդսմին, բավականին բարդ է սահմանել դատավարական գործողությունների ամբողջ շրջանակը: Օրինակ՝ կասկած չկա, որ մեղադրանք առաջադրելը քրեական հետապնդման ընթացակարգ է (ՀՀ քր.դատ.օր.-ի 203 հոդված): Սակայն դժվար է մեղադրյալի հարցաքննությունը նույնքան միանշանակորեն համարել քրեական հետապնդման ընթացակարգ: Մի կողմից նման հարցաքննությունը մեղադրանք առաջադրելու մասն է, բայց մյուս կողմից այն չի հետապնդում քրեական հետապնդման առջև դրված նպատակներ՝ բացահայտելու հանցագործություն կատարած անձին:

Այսպես, ՀՀ քր.դատ.օր.-ի 212 հոդվածի համաձայն, քննիչը պարտավոր է նախքան հարցաքննությունը պարզել՝ մեղադրյալն արդյոք իրեն մեղավոր ճանաչում է առաջադրված մեղադրանքում: Նշյալ պահանջը ոչ միայն հղում է կատարում անձին որպես մեղադրյալ ներգրավելու որոշմանը, այլև շեշտում է, որ նման հարցաքննությունն այնքան անխզելիորեն է կապված մեղադրանք առաջադրելու հետ, որ դա կարելի է դիտել որպես այն առաջադրելու ընթացակարգի մաս: Սակայն մյուս կողմից, համաձայն գործող քրեադատավարական օրենսդրության, մեղադրյալի հարցաքննությունը քննչական գործողություն է, որն ունի փոքր-ինչ այլ նպատակ:

¹ Տե՛ս **Дикарев И.Г.** Уголовное преследование: уточнение понятия // Российская юстиция. - М.: Юрист, 2013, № 9, էջ 23-25:

² Տե՛ս **Земляничин Е.И.** Понятие и механизм уголовного преследования // Актуальные проблемы уголовно-процессуальной политики Российской Федерации: материалы международной научно-практической конференции (Омск, 12 апреля 2013 г.). - Омск: Изд-во Омск. юрид. акад., 2013, էջ 199-203:

տակներ, քան քրեական հետապնդումը: Այն ուղղված է ապացույցներ ձեռք բերելուն, որոնք թույլ են տալիս պարզել կատարված հանցագործության բոլոր հանգամանքները: Դրան հատուկ ուշադրություն է դարձվում ՀՀ քր.դատ.օր.-ի 212 հոդվածի 7-րդ կետում, որտեղ ասվում է, որ մեղադրյալը հարցաքննվում է առաջադրված մեղադրանքի էության վերաբերյալ:

Ինչպես տեսնում ենք, բավականին բարդ խնդիր է սահմանել դատավարական այն գործողությունները, որոնք կազմում են քրեական հետապնդման ընթացակարգը¹: Սակայն դա անհրաժեշտ է, քանի որ օգնում է լուծելու քրեադատավարական օրենքը կիրառելու պրակտիկայում առաջացող խնդիրները, որոնց էությունը քրեական հետապնդման ենթարկված անձանց իրավունքների և օրինական շահերի սահմանափակման թույլատրելի սահմանները որոշելն է: Անհրաժեշտ է սահմանել չափորոշիչ, որի օգնությամբ հնարավոր լինի սահմանազատել քրեական հետապնդումը կազմող դատավարական գործողությունները վերջինիս հետ անմիջականորեն կապ չունեցող մնացած բոլոր դատավարական գործողություններից:

Նման չափորոշիչներից է քրեական դատավարությունում ներգրավված անձանց իրավունքները, ազատություններն ու օրինական շահերը սահմանափակելը: Արդեն բազմիցս նշվել է, որ քրեական հետապնդման առանձնահատկություններից մեկն այն է, որ ենթադրում է այն անձանց իրավունքների, ազատությունների ու օրինական շահերի սահմանափակումը, որոնց նկատմամբ դա կիրառվում է: Ընդ որում, դա կարող է լինել բավականին լուրջ սահմանափակում, այսինքն՝ անձը, որի նկատմամբ դա կիրառվում է, կարող է բավականին լրջորեն տուժել իր իրավունքների, ազատությունների ու օրինական շահերի սահմանափակման առումով: Բայց, դրանով հանդերձ, նման սահմանափակումը ոչ միայն օրինական է, այլև սահմանադրական: Օրինակ Հայաստանի Հանրապետության Սահմանադրության 25 և 27 հոդվածներում նախատեսված են ֆիզիկական և հոգեկան անձեռնմխելիության, անձնական ազատության իրավունքները: Մասնավորապես, ՀՀ Սահմանադրության 27-րդ հոդվածում սահմանված է, որ «Յուրաքանչյուր ոք ունի անձնական ազատության իրավունք: Ոչ ոք չի կարող անձնական ազատությունից զրկվել այլ կերպ, քան օրենքով սահմանված դեպքերում և կարգով»: Այսինքն՝ նշյալ իրավունքի սահմանափակումը թույլատրվում է համապատասխան խափանման միջոց ընտրելու դեպքում, որը ամրագրված է քրեադատավարական օրենսգրքում:

Մյուս չափորոշիչն այն է, որ վերոնշյալ ընթացակարգերը կիրառելի են միայն հատուկ սուբյեկտների նկատմամբ, որոնց մասին առանձնահատուկ նշված է քրեադատավարական օրենքում, ինչպես նաև այն անձանց, որոնք թեև դեռ ներգրավված չեն որպես մեղադրյալ կամ կասկածյալ, սակայն ենթադրաբար մեղավոր են հանցագործություն կատարելու մեջ²:

Այսուհանդերձ, ամենակարևոր չափորոշիչն այն է, հանուն որի իրականացվում են համապատասխան դատավարական գործողությունները: Քրեական հետապնդումը, ինչպես արդեն նշել ենք, նպատակ ունի բացահայտել հանցագործություն կատարելու մեջ մեղավոր անձին: Քննչական գործողությունները ապացույցների

¹ Տե՛ս **Дациева Х.Г.** Уголовное преследование - законодательный пробел в определении // Юридический вестник Дагестанского государственного университета. - Махачкала: ИПЦ ДГУ, 2012, № 4, էջ 94-96:

² Տե՛ս **Емляницин Е.И.** К вопросу о соотношении понятий "уголовное преследование", "обвинение", "подозрение", "предварительное расследование" // Вестник Омской юридической академии. - Омск: НОУ ВПО "Омский юрид. ин-т", 2013, № 2 (21), էջ 126-129:

հավաքման աղբյուր են, որոնց միջոցով լրիվության, բազմակողմանիության և օբյեկտիվության պահպանմամբ պարզվում են կատարված հանցագործության հանգամանքները¹: Ուստի դրանք կարող են նաև դիտվել որպես քրեական հետապնդումը կազմող դատավարական գործողություններ, սակայն պայմանով, որ այդ քննչական գործողությունները ուղղված լինեն կոնկրետ անձի մեղքն ի ցույց դնող հանգամանքների բացահայտմանը:

Վերոշարադրյալը թույլ է տալիս եզրակացնել, որ քրեական հետապնդումը կազմող դատավարական գործողությունների շարքին են դասվում.

1) քրեական հետապնդում առաջացնող դատավարական գործողությունները (<< քր.դատ.օր.-ի 34 հոդված),

2) համապատասխան խափանման միջոց ընտրելն ու կիրառելը,

3) մեղադրանք առաջադրելն ու այն պաշտպանելը,

4) հանցագործություն կատարելու մեջ մեղավոր անձին ձերբակալելը,

5) քննչական գործողությունները՝ պայմանով, որ դրանց օգնությամբ գործին կցվեն մեղադրական ապացույցները:

Վերոնշյալ բոլոր դատավարական գործողությունները հիմնականում մանրամասնորեն կանոնակարգված են քրեադատավարական օրենքում: Առավել հաճախ դրանք ոչ թե մեկ, այլ մի քանի փոխկապված գործողություններ են, որոնք ուղղված են քրեական հետապնդման միանգամայն որոշակի նպատակի հասնելուն: Այսինքն՝ դրանք նաև փոխկապված գործողությունների համակարգ են²: Որպես կանոն՝ այդ դատավարական գործողությունները կանոնակարգող նորմերն իրականացնելը հանգեցնում է բավականին կուռ և հաջորդական ալգորիթմի կառուցման, որին հետևելը թույլ է տալիս օպտիմալացնել քրեական հետապնդումը:

Սակայն պետք է նշել նաև, որ քրեադատավարական օրենսդրությունում դատավարական գործողությունները ոչ միշտ են միանշանակ կանոնակարգված: Դա մասնավորապես վերաբերում է այն դատավարական գործողություններին, որոնցով հարուցվում է քրեական հետապնդումը: Այսպես, << քր.դատ.օր.-ի 4-րդ գլուխը նվիրված է քրեական հետապնդմանն ու դրա տեսակներին: Սակայն այնտեղ ոչինչ ասված չէ այդ հետապնդումը հարուցելու կարգի մասին: Այդ հարցի պատասխանը չի տրվում նաև << քր.դատ.օր.-ի 25-րդ գլխում: Այնտեղ բավականին մանրամասնորեն կանոնակարգված է քրեական գործ հարուցելու կարգը, սակայն ոչինչ ասված չէ քրեական հետապնդում հարուցելու վերաբերյալ: Միևնույն ժամանակ թեև քրեական գործի ու քրեական հետապնդման հարուցումը փոխկապված են, սակայն դրանք նույն բանը չեն: Չէ՞ որ քրեական գործը հարուցվում է ոչ միայն կոնկրետ անձի նկատմամբ, այլև կատարված հանցագործության փաստի առթիվ, ընդ որում, այդ հանցագործությունը կատարած անձը քրեական գործ հարուցելու պահին կարող է և հայտնի չլինել: Այսպես, << քր.դատ.օր.-ի 175 հոդվածում ասվում է, որ քրեական գործ հարուցվում է դրա առիթների ու հիմքերի առկայության դեպքում: Դրանով հանդերձ, ոչինչ ասված չէ այն մասին, որ դա հարուցվում է կոնկրետ անձի

¹ St'u **Шрам Ю.И.** Понятие и сущность уголовного преследования // Уголовно-процессуальные и криминалистические проблемы борьбы с преступностью: Материалы научно-практической конференции, 25 марта 2010 г. - Орел: ОрЮИ МВД России, 2010, էջ 193-197:

² St'u **Панферов М.В.** Понятие уголовного преследования: содержание, формы и виды // Законность и правопорядок в современном обществе: сборник материалов II Международной научно-практической конференции: в 2-х частях. Часть 2. - Новосибирск: Изд-во НГТУ, 2010, էջ 240-245:

նկատմամբ: Ուստի չի կարելի քրեական գործ հարուցելը նույնացնել քրեական հետապնդում հարուցելու հետ: Չնայած ՀՀ վճռաբեկ դատարանը, անձի իրավունքների և օրինական շահերի պաշտպանությունից ելնելով, քրեական գործի հարուցման փուլում հնարավոր է համարում անձի մասնակցությունը համապատասխան բողոքի քննությանը: Այսպես, ՀՀ Վճռաբեկ դատարանը Համբարձում Հարությունյանի վերաբերյալ բողոքի քննությամբ իրավական դիրքորոշում է արտահայտել այն մասին, որ «... երբ մինչդատական վարույթի նկատմամբ հետագա դատական վերահսկողության կարգով քննվող բողոքն անմիջականորեն առնչվում է անձի իրավունքներին և օրինական շահերին, ապա վերջինս պետք է տեղեկացվի այդ բողոքի դատական քննության մասին, և նրան պետք է հնարավորություն տրվի մասնակցելու նշված բողոքի քննությանը:

Սույն գործով Հ. Հարությունյանի կողմից ներկայացված բողոքն անմիջականորեն առնչվում էր Հ. Ալեքսանյանի իրավունքներին և օրինական շահերին, քանի որ վերաբերում էր նրա կողմից ենթադրաբար կեղծիք կատարելու վերաբերյալ հաղորդման կապակցությամբ քրեական գործի հարուցումը մերժելու մասին որոշմանը: Ուստի, բողոքի քննության կապակցությամբ բազմակողմանի, լրիվ, օբյեկտիվ քննություն կատարելու նպատակով Առաջին ատյանի և Վերաքննիչ դատարանների կողմից Հ. Ալեքսանյանը պետք է տեղեկացվեր վերոնշյալ բողոքի դատական քննության մասին, և նրան պետք է հնարավորություն տրվեր մասնակցելու դրա քննությանը»¹:

Ներկայումս քայլեր են ձեռնարկվում քրեադատավարական օրենսդրությունում այդ բացը լրացնելու ուղղությամբ: Ներկայացվել է ՀՀ քր.դատ.օր.-ի նախագիծը, որի 191 հոդվածի համաձայն՝ սահմանվել է այն սուբյեկտը, որը լիազորված է հարուցելու քրեական հետապնդում: Այդ սուբյեկտը դատախազն է, ով անձին որպես մեղադրյալ ներգրավելու իր որոշմամբ հարուցում է քրեական հետապնդում:

Քրեական հետապնդումը կազմող դատավարական գործողությունների մյուս խումբը խափանման միջոցն ընտրելուն ուղղված դատավարական գործողություններն են: Համաձայն ՀՀ քր.դատ.օր.-ի 135 հոդվածի 3-րդ մասի 1-ին կետի՝ խափանման միջոց ընտրելիս անհրաժեշտ է հաշվի առնել վերագրվող արարքի բնույթը և վտանգավորության աստիճանը, որը մեղսագրվում է համապատասխան մեղադրյալին: Այսինքն՝ այստեղ միանգամայն ակնհայտ է խափանման միջոցի կապը ոչ միայն քրեական հետապնդման, այլև մեղադրանքի հետ, քանի որ նշյալ նորմը ցույց է տալիս, որ խափանման միջոց ընտրելը ըստ էության առաջադրված մեղադրանքի հետևանքն է:

Որպես քրեական հետապնդումը կազմող դատավարական գործողություն խափանման միջոց ընտրելը սահմանափակում է այն անձանց իրավունքները, ազատությունները և օրինական շահերը, որոնց նկատմամբ այն ընտրվում է: Ընդ որում, նշանակություն չունի, թե ինչ խափանման միջոց է ընտրվում, քանի որ դրանցից ցանկացածն ուղղված է այն անձի իրավունքները սահմանափակելուն, որի նկատմամբ դա կիրառվում է:

Ինչպես ասվեց, քրեական հետապնդումն իրականացվում է մեղադրանք առա-

¹ ՀՀ Վճռաբեկ դատարանի 2011թ. հուլիսի 13-ի Համբարձում Հարությունյանի որոշումը, ԵԿԴ/0004/11/12:

ջադրելու և պաշտպանելու գործողությունների համակարգում¹: Ընդ որում, չի կարելի նույնացնել բուն մեղադրանքը քրեական հետապնդման հետ: Չի կարելի նաև մեղադրանքը ստորադասել քրեական հետապնդմանը: Այդ երկու հասկացությունները թեև իմաստային առունով մոտ են, սակայն նույնական չեն: Ճիշտ կլիներ պնդել, որ դրանք երկու փոխայայմանավորված հասկացություններ են, քանի որ չի կարելի խոսել քրեական հետապնդման մասին առանց մեղադրանքի, և միևնույն ժամանակ չի կարելի խոսել մեղադրանքի մասին քրեական հետապնդման ընթացակարգից դուրս:

Քրեական հետապնդման էական տարրերից են քրեական հետապնդման սուբյեկտները: Նրանք այն պաշտոնատար անձինք են, որոնց քրեադատավարական օրենքը օժտել է քրեական հետապնդումը կազմող դատավարական գործողություններ կատարելու իրավունքով: Հաշվի առնելով, որ քրեական հետապնդումը լրջորեն ոտնահարում է անձի իրավունքները, ում նկատմամբ այն կիրառվում է, օրենքով սահմանվում է անձանց բավականին նեղ շրջանակ, որոնք կարող են իրականացնել քրեական հետապնդում: Նրանց թվում են, մասնավորապես, դատախազը, քննիչը, հետաքննության մարմինը: Այդ անձանց շրջանակն ավելի է սահմանափակվում առանձին դատավարական գործողություններ իրականացնելու մասին որոշումներ կայացնելու անհրաժեշտության դեպքում, որոնք, օրենսդրի կարծիքով, ուրիշների համեմատ է՛լ ավելի են սահմանափակում քաղաքացիների իրավունքներն ու ազատությունները: Օրինակ՝ համաձայն ՀՀ քր.դատ.օր.-ի 136 հոդվածի 2-րդ մասի՝ կալանավորումը և գրավը կիրառվում են միայն դատարանի որոշմամբ:

Քրեական հետապնդում կարող է իրականացվել միայն այն անձանց նկատմամբ, որոնց վերաբերյալ առկա են բավարար ծավալի ապացույցներ, որոնք թույլ են տալիս ենթադրել կատարված հանցագործությանը նրանց մեղսակից լինելու մասին²: Ընդ որում, պետք է նկատի ունենալ, որ ապացույցների այդ ծավալը բնավ չի ենթադրում, թե դա բավարար է համապատասխան անձի մեղավորության մեջ առանց երկմտելու վստահ լինելու համար: Այդ ծավալը բավական է միայն համապատասխան անձի մեղավորության մասին ենթադրություն անելու և քրեական հետապնդում հարուցելու համար: Ընդ որում, քրեական հետապնդումը համապատասխան հանցագործությունը կատարելու մեջ կոնկրետ անձին մերկացնելու գործընթաց է, որը ենթադրում է, ի թիվս այլ բաների, գործողությունների իրականացում ուղղված այդ անձի մեղավորությունը հաստատող ապացույցներ ձեռք բերելուն:

Քրեական հետապնդման դատավարական հռչակումը կարևոր է ոչ միայն մեղադրող կողմի, այլև պաշտպանության կողմի համար: Անձը, իմանալով իր նկատմամբ քրեական հետապնդում սկսված լինելու մասին, հնարավորություն է ստանում պլանավորելու և ձեռնարկելու գործողություններ՝ ուղղված արդյունավետ պաշտպանություն կազմակերպելուն: Մասնավորապես, այդ անձը հնարավորություն է ունենում ժամանակին ներկայացնելու ապացույցներ, որոնք արդարացնում

¹ St' u **Калинкин А.В.** Подозрение и обвинение как формы осуществления уголовного преследования // Вестник Саратовской государственной юридической академии. - Саратов: ФГБОУ ВПО "Сарат. Гос. юр. акад.", 2013, № 6 (95), էջ 193-198:

² St' u **Матвиенко И.В.** К вопросу о целях и задачах уголовного преследования // Актуальные проблемы борьбы с преступлениями и иными правонарушениями: материалы десятой международной научно-практической конференции. - Барнаул: Изд-во Барнаул. юрид. ин-та МВД России, 2012, Ч. 1, էջ 128-130:

են իրեն և առ ոչինչ են դարձնում մերկացնող ապացույցները: Դա թույլ է տալիս խոսել այն մասին, որ քրեական հետապնդման նորմատիվ ամրագրումը երաշխավորում է քաղաքացիների իրավունքներն ու ազատությունները, խոչընդոտում է քրեական դատավարությունում որոշումներ կայացնելու լիազորություններով օժտված պաշտոնատար անձանց կողմից կամայականությունները:

Հարկ է նշել, որ թեև քրեական հետապնդման տեսանկյունից իմաստ ունի առանձնացնել անձին, ում նկատմամբ հարուցվել է քրեական հետապնդումը, քրեական դատավարության տեսանկյունից այդ հասկացությունը անորոշ է և առանձնապես իմաստ չունի¹: Այսպես, գործող քրեադատավարական օրենսդրությունում որպես նման անձ նշվում են մեղադրյալն ու կասկածյալը: Բացի այդ, պետք է նշել, որ քրեական հետապնդում կարող է կիրառվել նաև այն անձի նկատմամբ, որին դեռ չի տրվել մեղադրյալի կամ կասկածյալի կարգավիճակ: Օրինակ, համաձայն ՀՀ քր.դատ.օր.-ի 175 հոդվածի, քրեական գործ կարող է հարուցվել հանցագործության հատկանիշների առկայության փաստով, ընդ որում՝ առանց նշելու դրան մասնակից անձին: Այդուհանդերձ, դրան հաջորդող դատավարական գործողությունները, որոնք պետք է իրականացնի քննիչը, պիտի ուղղված լինեն կոնկրետ անձի մեղավորությունը բացահայտող ապացույցների ստացմանը: Այսինքն՝ առկա կլինեն քրեական հետապնդմանը բնորոշ առանձին հատկանիշներ: Օրինակ, համաձայն ՀՀ քր.դատ.օր.-ի 229 հոդվածի, անձնական խուզարկություն կատարելը ոտնահարում է քաղաքացիների անձնական անձեռնմխելիության իրավունքը: Այն կատարվում է ոչ միայն կասկածյալի կամ մեղադրյալի նկատմամբ, այլև ուրիշ անձանց: Առանձին դեպքերում այդ անձինք հետագայում կարող են դառնալ կասկածյալներ: Նման խուզարկությունն ինքնին վկայում է այն անձի նկատմամբ քրեական հետապնդման մասին, որը դեռ չի ճանաչվել կասկածյալ կամ մեղադրյալ:

Քրեական հետապնդման կարևոր և ըստ էության որոշիչ տարրը դրա նպատակն է²: Դրանով է պայմանավորվում բոլոր դատավարական գործողությունների բնույթը, որոնցով իրականացվում է քրեական հետապնդումը: Ընդ որում, նպատակն է ձևավորում բոլոր այդ գործողությունների ամբողջականությունը՝ որպես միասնական համակարգ: Քրեական հետապնդման նպատակը կոնկրետ հանցագործություն կատարելու մեջ մեղավոր անձին բացահայտելն է: Դա ենթադրում է, որ իրականացվող բոլոր դատավարական գործողությունները ուղղակիորեն կամ անուղղակիորեն նպատակ ունեն ձեռք բերելու մեղադրական ապացույցներ: Հաշվի առնելով, որ նման ապացույցները հետագայում հանդես են գալիս որպես հիմքեր՝ համապատասխան անձի քրեական հետապնդման նպատակով կարևոր որոշումներ ընդունելու համար, քրեական հետապնդման նպատակը կարելի է դիտել որպես նման որոշման նախադրյալներից մեկը:

Քրեական դատավարության թե՛ տեսության մեջ, թե՛ պրակտիկայում հանդիպող հիմնախնդիրներից մեկը քննիչին հնարավորություն տալն է՝ համադրելու վերոնշյալ նպատակը մեկ այլ նպատակի հետ, որը նույնպես առաջադրում է քրեադա-

¹ St`u Дикарев И.С. Объект публичного уголовного преследования и значение его правильного определения // Правоведение. – С.-Пб.: Изд-во С.-Петербург. ун-та, 2007, № 2, էջ 66-73:

² St`u Ильин С.И. К вопросу о цели и задачах уголовного преследования // Уголовное судопроизводство. – М.: Юрист, 2007, № 4, էջ 16-19

տավարական օրենսդրությունը, գործի բոլոր հանգամանքները օբյեկտիվ, լրիվ և բազմակողմանիորեն հետազոտելը: Հնարավոր է համադրել այս՝ առաջին հայացքից անհամադրելի նպատակները: Կարծում ենք՝ այստեղ որևէ հակասություն չկա: Ինչպես նշվել է վերևում, քրեական հետապնդումը սկսվում է միայն դրա համար բավարար ծավալի և որակի ապացույցների առկայության դեպքում: Այսինքն՝ ակնհայտ է, որ դրանք ստանալու համար անհրաժեշտ է իրականացնել քննչական և այլ դատավարական որոշակի գործողություններ, որոնք էլ հնարավորություն կտան հավաքելու այդ ապացույցները: Նշյալ ապացույցները կարելի է ձեռք բերել լրիվ, բազմակողմանի և օբյեկտիվ քննության շնորհիվ: Միավորվելով մեկ համակարգում, հասնելով որոշակի ծավալի՝ այդ ապացույցները ձեռք են բերում միանգամայն որոշակի նշանակություն՝ ենթադրաբար բացահայտելով հանցագործության մեջ մեղավոր անձին: Սակայն նշյալ ապացույցները ձեռք բերելն էլ բնավ չի նշանակում քննիչի լիակատար հրաժարում իր կողմից իրականացվող բազմակողմանի, լրիվ և օբյեկտիվ քննությունից: Նախաքննության ամբողջ ընթացքում քննիչը առաջնորդվում է միայն համապատասխան անձի մեղավորության վերաբերյալ առկա ապացույցներով հիմնավորված ենթադրություններով: Նա լիակատար համոզվածություն չունի: Հենց դա էլ հիմք է ծառայում երաշխավորելու բազմակողմանի, լրիվ և օբյեկտիվ քննության իրականացումը:

СУЩНОСТЬ УГОЛОВНОГО ПРЕСЛЕДОВАНИЯ И ЕГО ХАРАКТЕРНЫЕ ПРИЗНАКИ В УГОЛОВНОМ ПРОЦЕССЕ

Нарек Минасян

*Инспектор Отдела должностного расследования
Департамента внутренней безопасности Полиции РА*

Принимая во внимание факт, что уголовное преследование многогранное понятие, которое не может быть определено только как функция уголовного судопроизводства, необходимо рассмотреть его с других характерных для него сторон. Уголовное преследование также система определенных действий, которая регулируется Уголовно-процессуальным законодательством. Так как уголовное преследование процессуальных действий оно включает в себя многие элементы лежащие в ее основе.

THE NATURE OF CRIMINAL PROSECUTION AND ITS CHARACTERIZING FEATURES AT THE CRIMINAL PROCEEDINGS

Narek Minasyan

*Inspector at the Chair of Service Inspection of the
Department of Internal Security of the RA Police*

Taking into consideration the fact that criminal prosecution is a multifaceted concept which cannot be defined only as a function of the criminal proceedings, it becomes necessary to consider it in the view of its other typical sides. Criminal prosecution is also a system of certain actions which is regulated by the Criminal Procedural Code. Since it is a system of procedural actions, criminal prosecution includes most of its underlying elements.

Բանալի բառեր – քրեական հետապնդում, քրեական հետապնդման հարուցում, քրեական հետապնդման սուբյեկտներ, մեղադրանք, մեղադրյալ

Ключевые слова: уголовное преследование, возбуждение уголовного преследования, субъекты уголовного преследования, обвинение, обвиняемый

Key words: criminal prosecution, initiation of criminal prosecution, subjects of criminal prosecution, defendant, charges